

Intervju: Paddy Ashdown, visoki predstavnik za BiH: “Impresioniran sam poslom koji je uradila komisija na čelu sa Diksonom”

Nakon nešto više od tri sata razgovora sa premijerima oba entiteta i države, Paddy Ashdown je sinoć bio zadovoljan onim što je čuo od svojih sagovornika kada su u pitanju naponi da se premoste razlike oko načina odlučivanja, sjedišta Uprave za indirektno oporezivanje i njen način rada na nivou države.

Paddy Ashdown: Da smo uspjeli još ranije osigurati odgovarajući način oporezivanja, penzioneri bi danas imali više penzije, a ne bi protestirali. Umjesto toga, stotine miliona maraka idu u džepove kriminalaca, političari se nisu dogovarali, a penzioneri moraju na ulice – kazao je visoki predstavnik na početku razgovora za “Dnevni avaz”.

Važnost PDV-a

On ističe da je uvođenje poreza na dodatnu vrijednost jedno od rješenja problema koje imaju ne samo penzioneri, već i ljekari, prosvjetni radnici, policajci, vojnici...

Paddy Ashdown: Optimista sam da ćemo konačno stvari postaviti tako da se stanje promijeni nabolje. Izuzetno sam impresioniran dobrim poslom koji je uradila komisija na čelu sa Džolijem Diksonom. Ostale su neke stvari koje se trebaju razriješiti, i prvi put sam optimista da je kompromis dobio pravo značenje, a ne negativno kao do sada – kaže Ešdaun. Ističe da je Komisija riješila centralno pitanje koje se ticalo prihoda.

– Osiguran je nesmetan dotok sredstava za funkcioniranje entiteta i sada se trebaju riješiti neka praktična pitanja rada – kaže Ešdaun.

Upitan kako je riješeno pitanje sjedišta i raspored regionalnih centara, te način odlučivanja u Upravi, visoki predstavnik je kazao da je postignut dogovor u oblasti rasporeda prihoda.

Država ima prednost

Paddy Ashdown: Država ima prednost kada se radi o prikupljanju carina, entiteti kada je PDV u pitanju, međunarodni predsjedavajući u narednih pet godina imat će prednost pri odlučivanju o administrativnim pitanjima.

Što se tiče sjedišta Uprave, ako želimo pokazati da je BiH “decentralizirana” država, onda državne institucije moraju biti smještene i izvan Sarajeva. Gdje će to biti, vidjet ćemo, ali sigurno sjedište neće biti tamo gdje smo nailazili na opstrukcije u provedbi mirovnog sporazuma.

Veliko je pitanje kako će biti raspoređeni regionalni centri. Po članu 6. Zakona o indirektnom oporezivanju, o čemu su se složili svi članovi Komisije, postavljeni su principi na osnovu kojih trebaju biti ustanovljeni regionalni centri. Oni se tiču ekonomske opravdanosti, službe građanima i stvaranja jedinstvenog ekonomskog prostora.

To su okviri u kojima se ovo pitanje rješava. Da li je opravdano u Sarajevu imati dvije carinske i PDV administracije? Ja mislim da nije. Stoga, kakva god odluka da se donese u vezi s ovim, poštovat će principe iz člana 6. ovog zakona – kazao je Ešdaun.

U gradnji koridora Vc se ne krši zakon

U Zagrebu danas neću govoriti o koridoru Vc. To je bilateralna stvar i samo me jedno u svemu zanima, a to je da se zakon

poštuje. Do sada mi niko od mojih saradnika nije došao i rekao da se to desilo.

Postoji razlika između onoga što je pravno i politički ispravno.

Da sam protektor, a BiH protektorat, možda bih se umiješao i u ovo, ali to nije slučaj. Kako sada stvari stoje u gradnji koridora Vc se ne krši zakon i stvar je bh. vlasti kako će voditi ovaj posao.

Vjerujem da ćemo u Zagrebu razgovarati o širokom sektoru pitanja – od povećanja saradnje kako bi se hapsili kriminalci do boljeg pokrivanja granice. Isto tako, moguće je da razgovaramo o statusu Srba iz Hrvatske koji su u izbjeglištvu u BiH u vrijeme kada Hrvatska kreće na put prema Evropi...